

Delegatkinja **Nermina Kapetanović** uputila je pitanje Vijeću ministara BiH koje glasi:

1. „Kada će Vijeće ministara BiH ponovo uspostaviti domaći CRPC, odnosno Komisiju za imovinske zahtjeve raseljenih lica i izbjeglica?

Aneksom 7. Dejtonskog mirovnog sporazuma uspostavljena je Komisija za imovinske zahtjeve raseljenih lica i izbjeglica (CRPC). Ona je bila neprikosnoven autoritet za povrat imovine i stanarskih prava raseljenim licima i izbjeglicama i svim licima kojima je imovina nezakonito oduzeta tokom rata u Bosni i Hercegovini. Komisija nije radila na osnovu propisa i zakona Bosne i Hercegovine, nego na osnovu vlastitih pravila. Odluke CRPC-a nije mogla preispitivati bilo koja institucija u Bosni i Hercegovini. Samo je CRPC, po prigovoru zainteresirane strane ili po službenoj dužnosti, mogao preispitati vlastitu odluku. Ovo tijelo imalo je međunarodni karakter, a njegovi su članovi imali imunitet. Mandat je bio vremenski ograničen i u tom periodu riješeno je preko 300.000 zahtjeva pri čemu je vraćeno više od 95% oduzete ili zaposjednute imovine. Predmeti i prigovori koji su rješavani pred CRPC-em nisu nikada bili predmet rada državnih organa, oni su se rješavali u duhu Aneksa 7.

Domaći CRPC formalno ne postoji od 1. 1. 2009. Po prestanku njenog rada odgovornost prelazi na Vladu BiH (dl. XVI. Aneksa 7). Problem u tom smislu predstavlja oko 700 spisa u kojima je na odluku stavljen prigovor. Neproduženje sporazuma, te sistemsko nerješavanje problema dovodi u konačnici do narušavanja ljudskih prava, koje obuhvata i pravo na vremenski razuman rok za rješavanje zahtjeva, pravo na efikasan pravni lijek. Sud BiH već duže vremena zahtijeva od Vijeća ministara BiH da se odredi o pravnom sljedniku CRPC-a, jer je taj pravni sljednik zapravo tužena strana u upravnom sporu.

Upravo iz tih razloga ponovo se vraćamo na Aneks 7 i član XVI. koji utvrđuje da po prestanku rada CRPC-a, odgovornost prelazi na Vladu BiH.

Odgovornost domaćih vlasti ispoštovana je u velikoj mjeri donošenjem zakona o preuzimanju neriješenih predmeta CRPC-a u entitetima. Problem je bio i ostao u spisima gdje je odluka donesena, legalan prigovor nije riješen i nema ko da ga riješi.

Iako je broj tih spisa relativno mali (oko 700), on je uveo institucije i Bosnu i Hercegovinu u problem iz kojeg se još uvijek ne vidi izlaz.

U skladu s navedenim, molim HITAN odgovor Vijeća ministara BiH u pisanoj formi na postavljeno pitanje.